

جنود العمل



ولو الحياة حلوة

أكيد عشان بيكم

رجالة فى الكلمة

والقوة فى إيديكم

بيضحكوا للشقا

وبيصبروا فى الجرح

وبيحمدوا ربنا

لو غمّسوها بملح

مين اللي قال عُمال

دى جنود وشقيانة

بلا رحمة

ليل ونهار

لاجلِ تفرحنا

تشوف ملامح الجدع

تلقى العجب فيها

يسكن فى قلبه الوجع

وبضحكة يداريها

حاسب يا برد الشتا

أصل البعيد غلبان

دافن فى قلبه الوجع

حالف فى يوم ما يبان

إرحم يا برد الشتاء

وارمي الدفا ساتر

أصل الجدع لساه

واقف وبيعافر

عمره فى يوم ما اشتكى

لو مالت الدنيا

كتفه فى يوم ما مال

ومهما زاد الوجد

عمرَّ بإيده جبال

تسلم إيديك يا جدع

وتعيش لي وتعمر

أصل الحياة من غيرك

صحراء بتتدمر

لو الحياة حلوة

أكيد عشان بيكم

.....